

# ÑAPAXAGUENAQTEGA DA L'AQTAC ÑI DIOS

## Aso lede so Daniel cap. 1, 2 qataq 3

"So nsoq mayi naŷamaxate' ñi Dios"

"Sanaqtrashiguem naua qadhuaxayi,  
shi'oxodenaq ñi Qadta'a"



"Qaq nai'ctaxa da huo'otaq sateuga ca ŷataqta napalñi nam  
ca'amguepi, qalaxayi sa ishit da huo'o ca yi'itaique, cha'ayi  
'am ŷataxala', aŷim qoueta'aguet".

Salmos 23:4

I'ot: Cornelio Castro qataq José Netoqqi

L'enaqtac: Luis Castro J.J. Castelli, Chaco, Enero 2005



# So nsoq mayi naŷamaxate' ñi Dios

## Qo'ollaxa da lliquiaxac so Daniel

Ñi Dios Ica'aguishic na llalaqpi so Israel da ŷaqto' i'axa't da l'aqtac ñi Dios da 'enauac na huetalec ana `alhua.

Ñi Dios ŷami' da Ichoxonnataxanaxa so Israel, nataq'en isouec c l'añaxac yi Egipto, ntel'a somayipi huaña yi alhua tojlec, ŷami' i aloq, ñaq queta da n'aqtagec.

Qalaxayi so Israel sa ipacchigui da 'eetapeguec ñi Dios. Ñi Dios huotaique da nadalaxat da lataxac na llalaqpi so Israel, nachi so Israel sa ŷalaxaguet na lqataxacpi mayi chigoqo'ot ñi Dios.

Ñi Dios ŷamaq so l'aqtaxanaxanec da ŷaqto' devitaqteetega da saqaŷaloq anac so huataxanaqpi babilonia l'ecpi. Sa qaŷauotaique da qan'axaŷaxana da ltaxaŷac so l'aqtaxanaxanec.

"Choxodaiqolqa qami' mayi qoñiitega no'on nam qauem, qataq na qauem nam qoñiitega no'on, ivida'a da ñigui qanqashiñi na napalaxa na yi'oqchigui, qataq na yi'oqchigui ñigui qanqashiñi na napalaxa, qaq na chim qalaq ama qanqashiñi, qaq na ama qalaq chim qanqashiñi".

Isaías 5: 20

- Qoñiitega no'on nam qauem.
- Nam qauem qoñiitega no'on.
- Qanqashiñi na napalaxa na yi'oqchigui.

- Na yi'oqchigui ñigui qanqashiñi na napalaxa.
- Na chim qalaq ama qanqashiñi.
- Na ama qalaq chim qanqashiñi.

¿nam qauem nqashin ñi Dios, aÿim nataq'en qauem ñaqashin?

Peta'a da lhuennataxa ca shiÿaxaua 'eeta': "ne'ena ñiqopita, nai'ctaxa da 'eetega sa ÿaÿamaxañi ñi Dios"

"na ÿalamaxatpi qaica ca ÿaÿajnapec, qataq sa ishit da aÿim ÿauatton-'enapec ñim qadataxala'-. Ne'ena ñalaqpi ÿataqta sa daÿajnataxan, sa ishit da dechimaqtaxanapec. Namayipi ÿataqta sa nqalaate' da i'ot ca sa ÿaÿamaxañi, qalaxayi sa ÿaÿaten da i'ot ca ÿaÿamaqchiguiñi."

Jeremias 4.22

Na llaqpi so Israel ÿataqta sa nqalaate' da i'ot ca sa ÿaÿamaxañi, qalaxayi sa ÿaÿaten da i'ot ca ÿaÿamaqchiguiñi. So Israel, ¿sa ÿaÿaten hu'o'o taq sa nshitaique da i'ot ca ÿaÿamaqchiguiñi?

So Israel nachi eetai' qai'ot so laponaxac, qalaxayi añi lquiyaqte qaÿoqta ñi Dios.

### **Da lhuennataxa ñi Dios**

Ñi Dios ÿataqta daquico souaxat da lataxac qauem so Israel. Ñimayi huotaique da naxat somayipi, nachi ÿamaq so l'aqtaxanaxanec da huaqattega somayipi.

Ñi Dios 'enapega so Jeremias, 'eeta':

"qaq 'am qome yataqta 'an'añaxat. Qojec da  
'au'aqtaxanem 'enauac ne'ena i'aqtacpi mayi  
'am samaxalec. Qaq sa ishit da ayi'itac, ten,  
qom 'am iviloxolaqchit ñaq'en namayipi."

Jeremias 1:17

### Da lasataxac so Israel

So Israel nqolguete' ñi Dios, nachi 'enapeco' 'eeta': "qaica ca Dios"  
Jeremias 5:12

Ataxayaxan 2 de Reyes imauec cap. 24, 2 de Crónicas cap. 36.

Ñi Dios huaqta'a so huataxanaqpi babilonia l'ecpi da qa'yauec  
Da qaicoñidai' na llaqpi so Israel. Somayipi yalectaigui so nsoq  
da l'enaxat Daniel qataq soua nauochaxa'u na l'enqa'te Ananías,  
Misael qataq Azarías.

So Daniel qo'ollaxa ñaq 17 huo'o taq 18 naua vi'iyi. So Jeremias  
i'axatta'a so Israel da qaicoñittai' netaña yi Babilonia 70 naua  
vi'iyi (So Jeremias cap. 25:8-14 qataq so Daniel cap. 9:2) Saxanaxa  
ivita soua 70 vi'iyi, so Daniel nachi chigoqchiguiña da yiyiñi aso  
lede. Qaq qo'ollaxa so Israel netaña yi Babilonia huo'o da nque'ej-  
naxac, daquicotac, nachi tachigui yi lauel ñi Dios, nachi ntogottac,  
nachi yi'iguelqot ñi Dios, nachi ñimayi yi'iguelaxata yi 'alhua yim  
chigoqchiguiña qo'olloxochiyi.

So Israel sa yalaxaguet qataq icoua'ai ñi Dios 1
---

Ñi Dios yamaq so l'aqtanaxanec 2
-------------------------------------

So Israel sa n'axayaxana 3
-------------------------------

So Babilonia qa'yauegue qaicoñidai' 4
--

So Israel ntogottac 5
--------------------------

yi'iguelaxalec da no'on da lataxac 6
---

# Qanapaxaguenaxac 1

so nsoq mayi naŷamaxate' ñi Dios ntel'a da  
lataxac. 'ataxaŷaxan so Daniel 1:1-7.

Ñi Dios qaica ca ishit da iqattac qaltaq qaica ca sa  
ŷaŷaten. Ñimayi huotaique da ŷapaxaguen so Israel  
llalaqpi da ŷoqta' ŷalaxaguet na lqataxacpi, nataq'en  
huotaique da ñi'iguelqot da i'amaqten ñi Dios. ŷoqo'oyi  
ñi qadataxala' ŷamaxalec so huataxanaqpi babilonia  
l'ecpi qaicoñi' so Israel llalaqpi.

So nta'a mayi l'enaxat Nabucodonosor huotaique da  
iŷaxana so nsoxoppiolec nalochiguiñi da lataxac, da  
ŷaqto' huapegue' na l'onatac so nta'a, qaq som  
nca'aguishicpi ŷalectaiguilo soua cuatro nso'q, so Daniel  
qataq soua nauochaxa'u.

So togoshic nta'alpi ilotaique cam 'eetec da ŷaqto' sa ishit  
da dataŷa'aguet so lcoñiteguishicpi. Nadalaxat da lataxac.  
So nta'a nquigaxajñi da l'añaxac, nqat da l.lagaxayic,  
qaica ca lasapachaxa 'enuac so lcoñiteguishicpi  
cha'ayi so nta'a maichi i'ot da sa ntounec da  
maichi lataxac hebreo l'ecpi.

So nta'a Nabucodonosor mashi ŷaŷaten da ŷaqto' da  
nadalaxat da lataxac, ŷoqo'oyi damaxasoxoolec  
qaŷapaxaguenec naua l'aqtaqa qaltaq naua nedaqa yi  
Babilonia. Nataq'en qanadalaxa't na l'enaxat ñi 'oonolec so  
shiŷaxauapi, qaŷauotaique da ŷoqta ŷachi da lataxac yi Babilonia,  
cha'ayi yi Babilonia qalota na qanatameetacot  
n'enaqtacpi, lŷa n'aqtaqa, lŷa n'enaxat, ñaq queta da  
n'aqtaguec.

# Dam nataxac yataqta huo'ó da naigui

	qom l'ec	hebreo l'ec
l'aqtaqa	-----qom l'aqtac-----	-----hebreo l'aqtac
l'oxoyaxac	-----nauedalec-----	-----lapagaxaic
l'enaxat	-----ñamaxaachi-----	-----yehoshu'a (Josué)
na aloq	-----ana nladañi-----	-----ala datoxoi
yí'oxoden	-----ana lasaxanna-----	-----pascua

So Daniel qataq soua nauochaxa'u qadamchigui yi lauel, da sa ishit da yalat da lataxac, soomayi yataqta machiguiñi, sa ishit da icoua'ai ñi Dios, qaltaq naua maichi l'aqtaqa, na aloq, som chigoxoguet .  
Soomayi maichi nauattootela't.

## Dos naua nataxaco Nataxac da í'axat na npa'atañi ¿tá'ainco yi aÿim qom l'ec?

'Am qonetalec cha'ayi huo'o so na'a'q ñi Dios lhuennataxa da 'am í'ot, 'am qontaigui da lquiyaqteÿaxac ñi qadataxala'. 'Am sa ishit da maichi 'au'ot da 'adataxac, ñi Dios í'ot. Huo'o so na'a'q ñi Dios 'am ÿami' 'ad'oxoÿaxac, qaltaq naua 'ad'aqtaqa, qaltaq dam lataxac 'anachaalataxac da ÿaqto' avi'oxoden ñi Dios.

"'Am nachi 'ad'onatac da í'oquiaxac nachi 'analoqteetapiguiñi qo'ollaq sootaigui na lauel aso ÿate'e. Qaq ÿoqo'oyi aÿim 'am shi'oxoden, cha'ayi huo'o da í'aalaxa, cha'ayi ÿataqta qaica ca 'en'am 'enauac na 'au'otpi."

Salmos 139:13-14

"Qo'ollaq saxanaxa da sau'o da 'adca'alaxa, qalaq nal'ena da 'am llica'aguishic; qo'ollaq saxanaxa da 'auañiguiñi, qalaq 'am seÿotauga, da sauotaique da 'au'aqtaxanem na ÿotta'a't shiÿaxauapi".

Jeremías 1:5

Dios lca'aguishic so shiÿaxaua qataq aso 'alo da nachi so 'adta'a qaltaq aso 'adate'e.

Ñi Dios 'am ÿanalec ana alhua. Ñi Dios sa ishit da í'ot ca sa ÿaÿamaxañi, sa ishit da isomapec, nachi 'am í'ot da ÿaÿamaxatchiguiñi cha'ayi ñi Dios 'am ÿauotec.



"Qalaq naua 'ad'ai'te yâuaachiguilo  
da i'oquiaxac qo'ollaq n'oxootac,  
qaq 'enauac de'eda nanettalec  
aca 'ede".

Salmos 139:16

Nataxac mayi saq cha'a  
¿négue't ca aÿim yâatapoigui ñi Dios?

Ñi Dios huotaique da qalota na llalaqpi da yâqto' en'am  
ñimayi da lataxac.

Qo'ollaxa da ñiguiñi ñi 'oonolec sa ishit da nachi llalec  
Ñi Dios.

"Ñi Dios qami' yânema da qadca'alaxauai  
naq'en so Cristo qo'ollaq qami' ñaq qoviitaigui  
da 'ico' qadleuaqai, souaxat nam  
sa yâyamaxañisat qataq nam qadasouaxashichi  
mayi qoviitaigui, qataq da souaxat da  
qoquiitague'da lataxac nam i'ottac na  
'onataxacpi mayi huetalec ana 'alhua qataq  
qau'ochiitac na 'eetapegueguesat som saq  
cha'a damaxasoxonapec mayi lma'na,  
som i'añaqchittac nam sa ishit da yâalaxaguet  
ñi Dios".

nataq'en 'enauac da shinaqta nachi  
shinaqta'am namayipi som hua'au vi'iyi,  
da qolaqtague' nam maichi shinaqtapeguecpi,  
qataq so'otaqtac da lqopitaxanaqtaic da  
qadapachiÿaxac qataq nam maichi  
qadhuennataxapi.

Qaq ŷoqo'oyi ŷataqta  
'itchiguiñida qomi' da huetelguete da  
qaica ca en'am da Ichic da lalemataicñi Dios da  
shinaqta'am 'enuac nam laŷipi shiŷaxauapi".

Efesios 2:1-3

Qalaxayi chigoqchigui da no'on n'axaŷaxac da n'aqtaguec  
so llalec ñi Dios da qomi' sa'amaqtenaq so Jesús ,  
huo'o da qad'ipiŷaxac, nachi qomi' ŷanaguilo da llalqa  
ñi Dios.

"Qalaxayi ñaqaiyita huo'o na ŷaconguet qataq  
i'amaqten somayi, qaq nachina na ŷanem  
da ŷoqta 'itchiguiñi na llalaqpi ñi Dios.  
Qaq namayipi sa ishit da 'eeta'am da lañoxoc  
na llalaqpi na yi'oqchigui shiŷaxauapi. Mayi da  
ñiguiñi, qalaq chigoqchigui da lqopitaxanaqtaic,  
huo'o taq da lhuennataxac namayipi, cha'ayi  
namayipi ŷataqta llalaqpi ñi Dios".

San Juan 1:12-13

Da Ichoxonnataxanaxa ñimayi qomi' ividaugalo, ŷoqo'oyi  
qomi' huo'o da qadhuataxanaxac qaltaq da qanaquitaxac  
cha'ayi ñi Dios qomi' deshinaxanalo, qaica ca en'am  
da lashichiŷaxac.

"Cha'ayi ñi Dios co'ollaq qami' deshinaxanalo, qalaq  
ŷataqta sa nalañi da qadashiichiyaxaqui.  
ŷoqo'oyi ŷataqta qaumachiŷo'ot ñi Dios da  
lli'oxonnataxanaxac da qad'oquiaxaqui qataq ñi  
qoquiŷapegue' qadqui'ii naamayi lalamqa'te ñi Dios".

1 de Corintios 6:20

Ñi Dios Ihuennataxa da ÿoqta 'am ÿacteec.

Nai'ctaxa da huo'ó cam 'am 'eetega. Sa 'an'axaÿaxana na huetalec ana alhua.

So Jesús lañoqo' yi Belén. Qo'ollaxa ñaq na'asolec somayi, taigu da Nazaret, naigui yi 'alhua Galilea, da pa'aigue da shi'u yi Israel. Huaña, da lañaxataxa somayi. Nam netaña yi Galilea qaica naigui qanqa'en, ÿoqo'oyi qo'ollaxa so Felipe nauane' so Natanael nachi da'aqtaxanem 'eeta': "qomi' ñauanaxai' ñim qoÿiitega Mesías, nta'a nca'alaxaqui. Nachi so Natanael 'enapeco:

"¿peta'a ishito' da huo'ó ca no'on da lataxac da chigoqchiguiña yi Nazaret"?(S. Juan 1.43-51)

- Yi 'alhua Galilea ÿataqta choxodaq, ÿataqta sa qanaloqneuo, qaica ca qoÿanaigui qanqa'en.
- Na shiÿaxauapi qai'otan so Jesús.
- Da Ihuennataxa na shiÿaxauapi so Jesús chochi shiÿaxauatto.
- Na Fariseopi qataq na dapaxaguenataxanec na nqataxacpi qaishiuen so Jesús souaxat da lañoqo' yi Galilea.

Qalaxayi Ñi Dios 'enapeco'.

"eda da ÿalamaxat' ÿalec ÿauotaxat, damayi ÿataqta ñitootapeguc"(Mateo 3:17).

So Jesús qaica ca Isallaxa, sa ishit da ñiguiñi nachi Ita'adaic ca Ima', saq amaqta na logoxot, nachi en'am ÿataqta llalec ñi Dios, huo'ó da l'añaxac chigoqo'ot ñi Dios.

ÿataqta ÿacteec da ÿaatapoigui ñi Dios.

So Daniel qaltaq soua nauochaxa'u huo'ó da lli'oxoyi'c cha'ayi hua'aqchiguilo naua l'aqtaqa ñi Dios.

Qalota so shiÿaxauapi ÿalaxaguet so nta'a Nabucodonosor, qalaxayi , so Daniel pi'i'a ñi Dios , nachi qoÿami' da l'añaxac.

-Ñi Dios ýami' da lataxac so Daniel.  
-So Daniel lalamaxat ñi Dios.  
-So Nabucodonosor huotaique da maichi i'ot da sa ntounec da lataxac so Daniel.  
-So Daniel qadamchigui yi lauel qaltaq sa ýalat da lataxac hebreo l'ec.

---

## Da ýaqto' da 'adhuennataxac

1-So nta'a huotaique da maichi i'ot da sa ntounec da lataxac so Daniel qataq soua nauochaxa'u.  
¿nachi en'am nagui?

2-Ñi Dios 'am ýami' da 'adataxac. ¿négue't ca ishit da 'au'ot aña n'onaxanaxaqui, ca 'ai'alaqpi qaltaq yi 'adma' da ýaqto' 'antel'a da lataxac na qom?

3-Na huetalec ana alhua hu'o da l'aqtaxanaxac, nachi ñi Dios nataq'en hu'o na maichi l'aqtaxanaxac, nachi npena't naua n'aqtaxanaxaco. ¿négue't ca 'an'axaxaxana?

---

## Qanapaxaguenaxac 2

So nsoq mayi naŷamaxate' ñi Dios

nca'altauec qui'itta. 'ataxaŷaxan so Daniel 1: 8-21.

Ana nede íaxat na qui'ittapi da lalamaxat ñi Dios.

"Am qadataxala', neguet'tom ca lŷa  
atamnaxala' mayi ishit da 'am  
qanalognaxanguet. Ŷataqta qaica ca  
lŷa qui'itta qataq 'amaqtaqaic da 'am  
'eeta'am. 'áushit ca 'au'ot ca huo'o da  
lli'oxoyic qataq ca huo'o da lchic".

Exodo 15:11

Da n'aqtac qui'itta da naigui sa ishit da nshipaxan, qataq  
sa ishit da qauem.

Ñi Dios qomi' iŷaxanalo da ŷaqto' qomi' lalamqa' te.

"Chaqdato' qome da qoviitaigui da achalataxac  
mayi ŷataqta qui'itta. Cha'ayi ñim Dios mayi  
qami' iŷaxanalo, ñimayi ŷataqta qui'itta.  
Cha'ayi nam ñiyigui'shi l'aqtaqa ñi Dios 'eeta'.  
qami' ŷataqta qui'itta qome da qadataxaqui,  
cha'ayi aŷim ŷataqta aŷim qui'itta".

1 de Pedro 1:15-16

Ñi Dios ŷami' na llalaqpi so Israel na lqataxacpi da  
ŷaqto' ŷaŷateetegue dam tata'ague somayipi, cha'ayi  
ñimayi huotaique da so Israel llalaqpi nauane' da  
l.lagaxayic, da lamaiquixac qaltaq da lca'alaxa. Nachi  
en'am nagui, qomi' iŷaxanoto da salaxasoxoguet na lqataxacpi.

Da yáqto' huo'ó da qadlagaxayic qaltaq da qadamaiqui axac qaltaq da qadca'alaxa chochaq huañi.

## **a-Qaỹi'iguen da qami' qui'itte.**

Naua l'aqtaqa ñi Dios nanettañi da huo'ó na sa qanallíc 'ataxaýaxan so Levítico capítulo 11.

So Daniel qaltaq soua nauochaxa'ú mayi netaña yi alhua Babilonia. So nta'a huo'ó so lamaxashicpi, huataxanaq 'añaxaicpi. So nta'a mayi damaxasoxootac da huo'ó ca sa yalaxaguet nachí yalauat so huataxanaq, cha'ayi qaica ca ishit da qoýit. Qalaxayi so nsoq mayi l'enaxat Daniel qataq soua nauochaxa'ú qaýauotaïque da qaiqui axanec so nallic mayi so nta'a qoýanot so nqolac qaltaq so laýipi n'enaqtacpi, qalaxayi so nsoq qadamchigui yi lauel, nachí sa ishit da chic, yalaxaguet na lqataxacpi ñi Dios.

"Sa ishit qome da qolliqui cam sa qaishitapéc da qanallíc".

Deuteronomio 14:3

So Daniel qataq soua nauochaxa'ú iuen da lca'aguilo.

- da yáyamaxadeete' so nta'a, nachí sa yalaxaguet ñi Dios

huo'ó taq

- da yáyamaxadeete' ñi Dios, cha'ayi huo'ó da lchi'c da ile'ú soomayi.

"Qalaxayi sa ishit qome da 'an'ÿomgui  
na lataxa, huo'ò taq ca l'ÿa mayi ishit da  
qantaxac, qataq sa ishit da qollic naua  
nalli'c mayi sa qaishita'pe".

Jueces 13:4

## **b-Da lasataxac so Daniel**

Ñi Dios sa ishit da qomi' ipataqta'aque da qomi' qui'itte.  
Aÿim da ÿasataxac, ¿négue't ca so'ot?

So Daniel qo'ollaxa napaxaguen huaña yi Israel na  
lqataxacpi ñi Dios, qalaxayi nagui ÿataqta qaÿoqta yi  
babilonia, ñaq 'eetalec da sa ishit da icoua'ai na  
nqataxacpi. Peta'a qomi' da sepa'aqtauo aña n'onaxanaxaqui  
na lauel nachi 'onaxaic da qadataxac, qalaxayi da ime  
yi laponaxac nachi sepa'axauec nachi dalaxaic da qadataxac  
ÿaqa'a. Huo'ò na ishit da naueguela't na shiÿaxaua 'eetega  
'onaxaic na huetalec ana alhua da nqopitaxanaqtaic  
na'ashaxac qalaxayi ñi Dios sa ishit da ÿaÿamaxaaden.  
ÿoqo'oyi iuen da qomi' sepataxasaqa'aguet na  
nqopitaxanaqtaicpi.

"Qalaxayi so Daniel qo'ollaxa  
lhuennataxa da sa deque'eu'a  
na aloq qataq na laquip lataxa  
so nta'a".

Daniel 1:8

"Qaq ÿataqta qanpoxoiñiyapegue' da  
qaulaquiitapegue' 'enauac na shiÿaxauapi,  
ÿataqta qui'itta qanqashiñi da qadataxaqui,  
cha'ayi ca sa qui'itta naq'en da nachaalataxac,  
nachi sa ishit da nauane' ñi qadataxala".

Hebreos 12:14

¿'am 'auauotaique da 'anauane' so qadataxala'?

## c-Da qui'itta nqouaguec ñi Dios.

Ñi Dios yataqta nqouaguec añi nquiyaqte qataq achaaalataxac ca yâyamaxadeeta ñimayi. Ca shiyaxaua yallitagui da yi'oqchigui nataxac. Ñi Dios sa ishit da yallitagui da yi'oqchigui nataxac, ñimayi yallitagui añi nquiyaqte.


Ñi Dios yami' da n'achiquiaxac so Daniel, yoqo'oyi so lamaxashic so nta'a sa ishit da dalemata.

So Daniel qalota so laypi nsoxoppiolec qaq somayipi imauéc chic na lqui'axanataxanaxat so nta'a. So Daniel qapió'olec na chic qalaxayi napacalec da l'añaxac, somayipi da lashiguiyaxac yataqta nca'alteec.

Ñi Dios yami' da l'añaxac so Daniel huetalec da l'oquiaxac. Nachi en'am nagui qaica ca qonoq qalaxayi ñi Dios qomi' yanma da qad'añaxac yoqo'oyi qomi' seshitaq da sasotaqtac qaltaq so'onaxanaqtac. Na doqshi qalviaxaic nasamñi, qalaxayi na qompi nai'ctaxa da mashi ya'axaiquiolec huó'o taq ya'axainole nachi en'am dasottac, nelec na bici damaicnaxan naua Ichil, do'onataxaatac, cha'ayi ñi Dios qomi' itaua'n.

Sa'alaxasoq aja' nachi 'eetec. Huó'o da qantonaxac.

Ñi Dios qomi' yanma da qad'añaxac





Dios ýami' da laýaj nec qaltaq lauatonaxanaxac so Daniel da ishit da i'axat na naigui na nchxonaxac qaltaq na nauanaqchic.

So Daniel sa ishit da maichi laýaj nec, ñi Dios ýami' somayi. Huo'ó ca shiýaxaua huo'ó da laýaj nec souaxat da na paxaguenaxac npa'aýañi, qalaxayi da laýaj nec sa ishit da chigoqo'ot ñi Dios, chigaqaigui ana nede npa'aýañi.

Qalota na ýaj naxanaxaicpi na huetalec ana alhua Qalaxayi qaica ca laýaj nec chigaqa'ague da piguem. Peta'a 'am sa 'auaýaten da 'edaxanaxac qaltaq 'ataxaýaxan, qalaxayi 'am ishit da huo'ó da adaýaj nec chigoqo'ot ñi Dios.

Santiago 3:14-17

**Da naýaj nec chigoqo'ot  
ñi Dios**

**da naýaj nec npa'aýañi**

qui'itta da nachaalataxac

lquiýaxanaqtaic

soxodaic

ñi'oxonnaxaic

nhualaxaunaxaic

deca'alaxan

choxonnataxanaxaic

huetaña da saqca  
ca nlagaxayic

n'axaýaxana ca lya

Llimlaxaic

i'ot ca ýaýamaqchiguiñi

So Daniel nca'altauec qui'itta nachi ñi Dios yí'iguen somayi qalaxayi somayi huotaique da ipacchigui da l'aqtac ñi qadataxala', nachi so Daniel yâconguet da lqouagaxanaqtaic ñi Dios.

“ Cha'ayi yôqta 'eesa da ñi i'otapecna yânem da la'yaj nec, lauatonaxanaxac qataq da ntonaxac cam tachigui da yâyamaxadeeta....”

Eclesiastés 2:26

-Ñi Dios yí'iguen da qui'itta so Daniel.  
-Da lasataxac so Daniel da nca'attauro ñi Dios.  
-Ñi Dios nqouaguec so Daniel:  
-so lamaxashic so nta'a sa dalemata.  
-yâmi' da l'añaxac na l'oqui axac.  
-yâmi' da la'yaj nec.

---

## Yaqto' da 'adhuennataxac

1-¿Néguet ca ishipaxanaqchit ca shiyaxaua nagui?

2-¿Néguet ca salaxaguet, ayim huo'otaq ñi Dios?

3-¿Maichi 'analoqtela't da ñi Dios 'am nqouaguec souaxat da 'am qui'itta? Sa ishit da souaxat 'am nataxala'.

---

## Qanapaxaguenaxac 3

So nsoq mayi naŷamaxate' ñi Dios dataŷa'aguet 'enuac na lqalaic. "ataxaŷaxan so Daniel capítulo 2.

So nta'a Nabucodonosor huo'o da lchxonaxac. Somayi huo'o da lhuogoxo cha'ayi sa ŷaŷaten ca naigui so lchxonaxac. Somayi ipi'itaxana da ŷataqta 'eesa, ŷataqta ilaqpigui'. Ime, nachi somayi qaica ca l.lagaxayic qaltaq qaica ca lamaic da l'ochaxa.

So nta'a iŷaxana so l.latacpi, huo'o na ŷalectauo shiŷaxaua ilapiguiñi, qaltaq huo'o na shiŷaxaua ishit da i'axat cam ñaq natai', da ŷaqto' ishit da i'axat so lchxonaxac som nta'a, cha'ayi qalota da lqalaic.

Nachi somayipi 'enapeco':

"qaica ca ishit da i'axat na huetalec ana alhua, chaqnata na hueto'ot na piguem nnatacpi qaipe'etega da ishit da i'axat so lchxonaxac so nta'a".

### **Huo'o da lqalaic**

So nta'a ŷataqta denotac, ŷoqo'oyi damaxasoxoolec so shiŷaxauapi da qaŷalauat nam maichi l.latacpi mayi i'axattau'a ca saq cha'a. Nataq'en qailaique so Daniel qaltaq soua nauochaxa'u da qaŷalaua't soomayi.

¿ca 'eetec so Daniel qo'ollaxa?

¿nqañoxojñi, huo'o taq datauec huo'o taq nañan da qaŷalauat?

### **So Daniel dataŷa'aguet na lqalaic**

So Daniel iuen da ŷaŷamaxajñi na lqalaic. Somayi sa ŷaŷaten cam 'eetec, qalaxayi sa ishit da nañaxaañi.

Qo'ollaxa huo'o da lqalaic, 'am sa ishit da 'auatta'a da 'anac ca shiŷaxaua da ŷaŷamaxajñi na lqalaic. 'Am 'auen da

qoñishiguem, cha'ayi qomi' `añaxaiqa, da qad'añaxac chigoqchigui som qomi' lauotaqa'te. `Am ishit da `anoxotchiviigui da l'enaxat so Jesús.

**So Daniel `enapegalo soua nauochaxa'u da itauan somayi.**

Qomi' da huo'ó yi sevidaxaguet, nachi qomi' sa saýatenaq ca shinaqtec. Seuenaq da qomi' i'ñaqchit ca qadqaýa `amqajnataxanaxaic.

`onaxaic da qaýaýamaxajñi ca sa ýaýamaxañi ýoqo'oyi iuen da `an'axaýaxana ca `adquedoxonec na `am ýami' lqataxacpi.

"Qaq dam nauotaxanaqtaic mayi ýataqta  
Ita'adaic `eeta': ca shiýaxaua ishit da  
ýaalec da nachaalataxac na nauochaxauapi"

San Juan 15:13

Nataq'en añi n'onaxanaxaqui da ipacchigui na nqataxacpi. Na `amqajnataxanaxaicpi ishit da itauan ca lqaýa da huo'ó ca lalolaxa, sa ishit da do'onataxaatac, nachi qoýami catai' nallic.

**So Daniel natameetacot ñi Dios**

So Daniel qataq soua nauochaxa'u iýaxanoto ñi Dios da ichoxode'n soomayi, cha'ayi ýataqta naýateeta't.

So l.latacpi so nta'a natameetacot na hueto'ot na piguem, ana huaqajñi, ñi ca'agoxoic qaltaq añi nala' qaltaq na nnatacpi hueto'ot na piguem, qalaxayi qaica ca ishit da l'axat ca naigui so lchxonaxac so nta'a.

So nsoq Daniel ñim natameetacot Dios `enauac napacalec nam laýipi diospi.

"Ñi qadataxala', nachifñi ñi icoÿatta'ague  
da yiquiaxac qataq nachifñi ñi ica'alaxa.,  
qaq ðnégue't ca ishit da shi'itega qone'?  
ñi qadataxala' nachifñi ñi npaxattalec da  
ñachaalataxac, ðnégue't qone' ca shi'itaique?"

"Qaq nai'ctaxa da huo'taq qalota na  
allippi aÿim colesop, qalaxayi añi  
iquiyaqte sa ishit da ñi'i.  
Nai'ctaxa da huo'otaq naÿamaxajñi  
da aÿim iloquiaxan, qalqa'a aÿim  
shi'imaqtom"

Salmos 27:1 , 3

Ñi Dios ÿasateguet da natamnaxac so nsoq Daniel.  
Ana nede i'axat da ñi Dios ÿachaxana so nsoq Daniel  
da ÿachitoigui da l'ochaxa nachi dechoxootac, dechoxootega  
som lchxonaxac so nta'a, da ÿaqto' ñi Dios ÿami' so  
nsoq da ishit da i'axat ca naigui som nchxonaxac  
mayi qaica ca ishit da i'axat.

Ñi Dios nataq'en ÿami' da lauanaqchic na qompi, qaltaq  
da lchxonaxac, qalaxayi sa ishit da huo'o ca iÿalatapigui'  
da ÿaÿaten ca naigui som lchxonaxac. Nachi en'am  
so nsoq Daniel.

Hua'auñi da iÿaxanot ñi Dios da ÿaqto' ÿaÿaten ÿoqta  
'eesa.

So Daniel ÿi'oxoden ñi Dios cha'ayi ñimayi itauan.  
Sa ishit da 'acou'ai da lchxonataxana ñi Dios.

"ÿataqta imauec ñaq'en da ñachaalataxac  
da shi'oxoden ñi qadataxala',

“Ûataqta imaec ñaq’en da ÿataxac da  
shi’oxoden dam qui’itta l’enaxat.  
Ûataqta semato’ot ’enauac da ñachaalataxac  
ñi qadataxala’ da shi’oxoden,  
Ûataqta sa ishit da huo’o ca ’oonolec  
secoua’ai nam i’otpi”.

Salmos 103:1-2

### **So Daniel ÿanot da n’achic ñi Dios:**

-cha’ayi da n’añaxac qaltaq da naÿaj nec nachi neto’ot  
ñi Dios.

-cha’ayi ñimayi ’enauac ilotegue’ na huetalec ana alhua  
imata’a’t.

-cha’ayi ñimayi imeteetac da l’onataxanaxac na nta’alpi  
npa’aÿañi da ñi ’oonolec nta’a ÿaÿaten da l’onataxanaxac  
da ’onaxaic qaltaq na qauem da l’onataxanaxac. Qaica ca  
ishit da decachiÿot ñimayi.

-cha’ayi ñi Dios ÿan da naÿaj nec.  
Nai’ctaxa da sa ishit da ’anapaxaguen aca  
paxaguenaxaqui.

-cha’ayi ñi Dios nachi en’am ÿauatton na huetaigui na  
napalaxa qaltaq yi na’a’q.

### **So Ichoxonaxac so nta’a Nabucodonosor**

So nta’a dechoxootega so n’enaqtac ÿataqta Ita’adaic.  
Som dechoxootega so nta’a n’enaqtac nachi naigui nam  
nta’alpi npa’aÿañi’ mayi deuotaxanec na ’alhua,

Lma'te ale'u na qom na na'aguelo, namayipi nta'alpi quetague da lcachaxac, yacona na lma' nam yataqta choxodaq, napacalec nam nanettañi lataxacpi sa yalaxaguet.

Namayipi maichi na'yajna' nam yajnaxanaxaicpi nachi qaica ca yanaigui nam choxodaqpi.

So coma' naigui so qadataxala' qom ltaq ñi'iguelaq ana 'alhua. Nachi so coma' qome da ivita ca na'a'q nachi najñi nachi ilaxachigui aso n'enaqta, yataqta dolachigui, isotchigui ivida'a na l'at da ishit da yachi na Isochi qaica ca ishit da n'onañi, yataqta qui'itejlec som netaña.

So qadataxala' huo'o ca na'a'q nachi ñi'iguelaq ime da l'onataxanaxac na nta'alpi npa'ayañi. Qaica ca lya nta'a, nachi 'oonolec so qadataxala' Jesús da ilo'ogue 'enauac na huetalec ana 'alhua qaltaq na hueto'ot na piguem. So Jesús qom ñi'iguelaq ndogoñi da l.lagaxayic qaltaq da ntonaxac, ime da nque'ejnaxac nam quetague' somayi.

### **Qomi' huo'o da qadhuataxanaxac**

- So Daniel huo'o da lqalaic.
- Data'ya'aguet na lqalaic:
  - iyaxana soua nauochaxa'u da somayi itaua'n.
  - da natameetacot ñi Dios.
- Ñi Dios isouec somayi da lqalaic.
- Nagui huo'o na nta'alpi npa'ayañi qauemaic, qalaxayi huo'o ca na'a'q anac da l'onataxanaxac ñi Dios da ilo'ogue 'enauacna.



Da yâqto' 'adhuennataxac.

---

- ✓ 1-¿Alaique ca 'antaunaguec da huo'ó ca avideguet lqalaic?
- ✓ 2-¿Da avideguet da lqalaic nachi 'anmittaique ñi 'oonolec mayi ishit da yâyamaxajñi qanatamnaxala' na'ague da piguem da l'enaxat Dios?
- ✓ 3-¿Ndotec da 'anmittaique ñi Dios da huo'ó ca avideguet lqalaic?
- 4-So qadataxala' nactaigui da lli'oxoyic qom ñi'iguelaq, ¿'am itauan da n'aqtaguec so qadataxala'?



## QANAPAXAGUENAXAC 4

So nsoq mayi naŷamaxate' ñi Dios huo'ó da lpi'iyaxac. 'ataxaŷaxan capitulo 3 de Daniel.

'enuac qomi' amqajnataxanaxaic, huo'ó da qadpi'iyaxac, sepi'iq'a' ñi Dios mayi saq cha'a.

"da huo'ó da qadpi'iyaxac, qaq nachida da ŷoqta 'eesa naq'en da saconaxaguet cam seuataqtaique, qataq nachida da ŷoqta 'itchiguiñi naq'en da yi'oq cam sa ishit da cha'a."

hebreos 11:1

Da npi'iyaxac nataq'en naigui da seca'ataxague so qadataxala'. Nachi en'am da huo'ó ca sevida'aguet da lqalaic da qadpi'iyaxac qaŷi'iguem.

"qami' ŷaqaŷa't, ŷataqta ŷacteec qanqashiñi da qantonaxaqui qom qami' nvitalo na ŷotta'a't ñi'iguenataxanaxac. Cha'ayi mashi qauaŷajñiita qom ivita da qaŷi'iguen da qadpi'iyaxaqui nachi huaña, qaq nquic da qanhualaxaunaxaqui."

Santiago 1:2-3

Qaŷaloqnxana

---

Ca shiŷaxaua 'eetega da deqataxaatac na hualoq ishit da

Ivi' da nqat naua lhua'q 200 kilos yi 5 horas.

¿ca `eetec da ishit da saÿaten da ÿoqta `eesa?

Aÿim shi'iguen ca shiÿaxaua da ÿoqta `eesa.

Nachi en'am ñi Dios ÿi'iguen da qadpi'ÿaxac da ÿoqta `eesa.

## Da ñi'iguenaguec soua 3 nso'q

So nta'a damaxasoxoolec so n'enaqtac da qai'ot ivi' 30 yi lalogaxa qaltaq yi hua'axagui ivi' 3 yi lalogaxa.

ÿamaq so `oonolec l.latac da isoxon da imauec somayipi so lcoñiteguishicpi da i'ado'to naua l.llicte'l da ishit da ÿi'oxoden, natamnot so n'enaqtac.

Ca shiÿaxaua da sa ÿalaxaguet nachi ishit som nta'a da ÿasaxaigui aso nqatelaxanaxaqui lta'adaic na l'edaxa. soua nso'q mashi ÿaÿate'n da l'aqtac ñi Dios.

"sa ishit qome da `au'ot ca `adqolac da huo'o taq `au'enaxatchigui ca hueto'ot na piguem, huo'otaq na huetalec ana `alhua, huo'otaq ca huetaigui na ne'etaxat mayi pa'atañi ana `alhua"

Exodo 20:4

"aÿim, mayi aÿim nataxala', damayi nachida da i'enaxat, qaç sa ishit da sashiitem ca ÿaqa'a dam ÿi'oxoyic, qataq sa ishit da qaÿi'oxonneguet ca chochi nqolac da i'enaxat"

Isaías 42:8

Soua nso'q ishit da lca'ateu'a cam `oonolec, ¿chaq négue't ca ishit da ÿalaxaguet da natamnoto' so nqolac huo'otaq natamnoto' ñi Dios?

Soua nso'q yalaxaguet ñi Dios.

Qo'ollaxa so ncoñiteguishicpi hua'axaÿa da l.lamaxa aso nviqepi. Nachi somayipi 'enuac naua l.llicte'l da natamnot so nqolac, qalaxayi yalectrauo soua nso'q sa ishit da i'adyiñi naua l.llicte'l.

Soomayi nachattrañi cha'ayi sa i'amaqten so nqolac.

Soomayi sa yáyate'n da itaua'n ñi Dios, qalaxayi soua nso'q nachi en'am sa ishit da natamnot so nqolac.

Soomayi qaica ca nañinnaxa'c, nachi en'am da qaÿalauat.

"qaq yataqta Ita'adaic qome qanqashiñi da qantonaxaqui da qauacoñiguuet ñimayi, cha'ayi maichi qad'amqajnataxanaxauai so qadataxala', qataq nachi eetai' qome da yataqta qauauochiic ca 'eeta'am ñimayi".

Filipenses 1:29



So l.latacpi so nta'a qai'aqtaxaneu'a somayi da yalectrauo soua 3 nso'q nachattrañi, nachi so nta'a yataqta lta'adaic da layiloxo, yoqo'oyi somayi na lashic yataqta yoxosa'a yaqapauec da nnogoxonaxac.

Anac so shiyaxauapi yataqta logodaiqa da yaqto' qayaconeu'alo soomayi da qaicoñidai' da qayaxadoigui aso nqatelaxanaxaqui yataqta lta'adaic na l'edaxa.

Ñi Dios sa ishit da yala't soomayi.

Nataq'en qomi' nagui sa ishit da qomi' yala't.

"qom ivita da `am `au'axasoxolec ca ne'etaxat qalaq ayim `am ñinactague'.

Qataq da `au'axasoxolec ca tala, qalaq sa ishit da `ogaxaic.

Huo'o taq da qoquichiguingui ca nodec, qalaq sa ishit da `am yavigaxat"

Isaías 42:3

So nta'a yataqta ilaqpigui' cha'ayi qo'ollaxa yalliu'a aso nqatelaxanaxaqui nachi ila'alo soua 4 shiyaxa'u nachattrañi huejdaigui na l'edaxa.

¿ta'ainco 4 shiyaxa'u?

Cha'ayi soomayi yalectauo so Jesús.

**Da Ihuennataxa so nta'a**

**da Ihuennataxa ñi Dios**

qaicoñidai'

qaisode'c

huetraiya'

queuotapiguisalo

yavi'c

no'oita

Ile'u

nca'altrauec

3 shi'axa'u


4 shi'axa'u

nogoxot colaqtac

nogoxot sa ishit da  
colaqtac

So nta'a i'amaqten ñi Dios souaxat da Ipi'i'axac soua  
nso'q.

Nachi en'am nagui qalota na i'amaqten da 'ad'aqtaxanaxac.  
Da huo'o yi na'a'q nachi huo'o yi avideguet, yataqta  
Ita'adaic da lqalaic.



-So nta'a i'ot so n'enaqtac nachi  
damaxasoxoolec da natamnot.  
-So Daniel qataq soua nauochaxa'u ya'ate'n  
da l'aqtac ñi Dios.  
-Sa yalaxaguet so nta'a.  
-Qayasaxaigui aso nqatelaxanaxaqui soomayi.  
-Soomayi ipi'ia ñi Dios, nachi ñimayi ntel'a.  
-So nta'a yauattoolec ñi Dios souaxat da  
lpi'i'yaxac soomayi.

## Da yaqto' da 'adhuennataxanac

---

1-¿'au'aqtaxanem ca lya shi'yaxaua da 'adpi'i'yaxac?

2-¿huo'o yi na'a'q da 'adhuennataxac da ñi Dios  
'am yalat?

Ana n'onaxanaxaqui ca pastorpi  
huo'o ca iuen da napaxaguen ana  
nede, ishit da iyaxanot so qadqa'ya  
José Netoqqui, netaña yi Castelli,  
Carlos Lauth 450 huo'o taq so  
qadqa'ya Cornelio Castro, netaña yi  
barrio quinta 12, Castelli.